

इस्त्रायलियोंक रॉजोंक काँथ

परमेश्वर एक नई रॉज छांटनी

(? शमूएल १६:१-१३)

जब रूतोंक नाति-नातिणी जवान है ग्याछी, उ बखत इस्त्रायलियोंल परमेश्वर धैं आपण लिजी एक रॉज मांगौ। पर यौ सुणिबेर परमेश्वर कैं भौत दुःख हौ, किलैकि मैसोंक यौ मंशाल परमेश्वरल यौ जाणि ले कि मैस उनुमिं पुर भरौस नि करन। फिर लै परमेश्वरल उनेरि प्रार्थना पुर करी, और शाउल नामक मैस कैं इस्त्रायलियोंक रॉज बणा। लेकिन उ भौत जलदी परमेश्वरक नीमों कैं टोड़िबेर गलत बाँट हिटण लागौ, यैक लिजी परमेश्वरल फैसाल करौ कि उं शाउलक बदाव एक दुसर रॉज बणाल।

प्रभु परमेश्वरल आपण सेवक शमूएल धैं कौ, "मील शाउल रॉज कैं छोड़ि है और तु वीक लिजी दुःखी नि हो। उठ, सींग मिं तेल भर और बेतलहम नगरक रुणी यिशैक पास जा, किलैकि मील वीक च्यालों मिंबे एक कैं रॉज बणूणक लिजी छांति रॉखौ।" (ओबेदक च्यल यिशै, रूत और बोअजक नाति छी।) तब शमूएलल कौ, "मी कसिक जै सकनू? अगर शाउल कैं पत्त चलल, तब उ मिंकेँ ज्यूनै मारि द्यल।" लेकिन परमेश्वरल कौ, "तु वांक मैसों धैं कये, "मी परमेश्वरक लिजी भेट चढूणक लिजी ऐ रयूं।" और तु यिशै और वीक च्यालों कैं लै भेट चढूणक लिजी बुलाये। तब जो च्यलक नाम मी तुकेँ बतूल, तु वीकेँ अभिषेक करिये।"

यैक बाद शमूएल परमेश्वरक हुकुमक अनुसार बेतलहम आ। जब वांक मैसोंल सुणौ कि शमूएल यां ऐ रई, तब उं डरनै वीक पास भेट करणक लिजी आई। और ऐबेर उधैं पुछौ, "के तुम हमर दगाड़ दोस्ती करणक लिजी ऐ राछा?" तब शमूएलल कौ, "होई, मी दोस्ती करणक लिजी और परमेश्वर कैं भेट चढूणक लिजी ऐ रयूं। यैक लिजी तुम आपुंकेँ शुद्ध करो और म्यर दगाड़

भेट चढूणक लिजी हिटो।" यैक बाद शमूएलल यिशै और वीक च्यालों कें शुद्ध करिबेर भेट चढूणक लिजी और खॉणक लिजी न्यूत दे।


जब यिशै और वीक च्याल आई, तब शमूएलल यिशैक ज्यठ च्यल एलीआब कें देखिबेर आपण मन-मनै कूण लागौ, "पक्क यौ परमेश्वरक अभिषिक्त रॉज छु!" लेकिन परमेश्वरल शमूएल धैं कौ, "तु वीक सूरत कें झन देख और न वीक लम्बाई-चौड़ाई मिं ध्यान दे। किलैकि मील उकै ठुकरै रॉखौ, किलैकि म्यर देखण मैसक जस न्हैं। मैस तो भैरक सूरत कें देखुं, लेकिन मी दिल कें देखनू।"

तब यिशैल अबीनादब कें बुलवैबेर शमूएलक सामण भेजौ, लेकिन शमूएलल कौ, "प्रभु परमेश्वरल यकै लै नि छांटे रॉख।"

तब यिशैल शम्माह कें भेजौ। पर शमूएलल कौ, "परमेश्वरल यकै लै नि छांटे रॉख।" और इसिक यिशैल आपण सातों च्यालों कें शमूएलक सामण भेजौ।

यैक बाद शमूएलल यिशै धैं कौ, "प्रभु परमेश्वरल इनुकै नि छांटे रॉख। के तुमार च्याल इदुकै छना?" यिशैल कौ, "म्यर एक सबों हबेर नॉन च्यल आइ छु, लेकिन उ ऐल गोरु-बकरोंक ग्वाव जै रौ।" यौ सुणिबेर शमूएलल यिशै धैं कौ, "तु कैकणी भेजिबेर उकै बुलवा, जब तलक उ

नि आल तब तलक हम खॉणक लिजी नि बैठूं।" यैक लिजी यिशैल कैकणी भेजिबेर उकै भितेर बुलवा। उ देखीण-चाणक भलौ छी। और प्रभु परमेश्वरल शमूएल धैं कौ, "उठ, यैक अभिषेक कर, यौ वी छु।" तब शमूएलल सींगवाँल तेल दाउदक ख्वर मिं खितिबेर उनर सामण वीक अभिषेक करौ। यैक बाद प्रभु परमेश्वरक आत्मा दाउद मिं उतरी, और उदिन बे उ उमिंजी रुण लागी।



शमूएल दाउद कें अभिषेक करणौ

पलिशती गोलयत

(१ शमूएल १७:१-१६)

यैक थ्वाड़ बखत बाद पलिशती जातिक मैसोल इस्रायलियोंक दगाड़ लड़ैक लिजी आपण फौजक टुकड़ियों कै सोकोह नगरक पास जॉम करौ। तब शाउल और इस्रायल देशोंक सब सिपै लै वां जॉम हई। उनुल एलाह घाटि मिं आपण पड़ाव लगाई और पलिशतियोंक दगाड़ लड़ै करणक लिजी तैय्यारी करण लागीं। पहाड़क एक तरफ पलिशती सिपै और वीक दुसर तरफ इस्रायली सिपै ठाँड़ छी। और उं द्विनोक बीच मिं एक घाटि छी।

तब पलिशती पड़ाव बे गोलयत नामक एक भौत लम्ब-चौड़ सिपै निकलौ, जो लगभग साढ़े नौ फुट उंच छी। वीक रूवर मिं पितवक टोप और वील आड मिं पितवक कवच पैर राँखछी, जैक भार सत्तावन किलो छी। वीक खुटॉन मिं लै पितवक कवच छी, और वीक कानि मिं वीक बणकाँट छी। वीक भालक बीन भौत ठुल छी, और यैक लुवक टुकक भार सात किलो छी। और वीक अधिल-अधिल बे वीक ढाल ली जाणी मैस छी।

गोलयत इस्रायली सिपैनोंक कतारक सामण पुजिबेर कूण लागौ, "तुम लड़ैक लिजी ठाँड़ है राछा, लेकिन आँब के चैराछा? के मी पलिशती सिपै न्हैतियू, और के तुम शाउलॉक सिपै न्हैतिया? तुम आपुं मिंबे एक मैस कैं छांटो, जो पहाड़ बे उतरिबेर म्यर पास ऐबेर लड़ै करो! अगर उ म्यर दगाड़ लड़िबेर मिंके मारि दियो, तब हम सब तुमार गुलाम बणि जूँल। और अगर मील उके मारि दियौ, तब तुम सब इस्रायली हमार गुलाम बणला। आज मी तुम सबों कै चुनौती दिंनू, तुम आपण एक मैस कैं म्यर सामण भेजो, जो म्यर दगाड़ लड़ै करो।"

जब शाउल और इस्रायली सिपैनोंल यौ बात सुणी, तब उनार होश उड़ गयाय। और उ पलिशती सिपै चालीस दिन तलक रात्ति और ब्याव ऐबेर इस्रायलियों कै चुनौती दिबेर उनर सामण ठाँड़ है जाँछी।

दाउद शाउलक पड़ाव मिं

(१ शमूएल १७:१२-१४, १७-५७, १८:२)

यौ बखत दाउद आपण बौज्यू यिशैक दगाड़ रैबेर भेड़-बकारोंक देख-भाल करछी, लेकिन वीक ठुल भे शाउलक दगाड़ लड़ैक लिजी न्है गयाछी। तब एक दिन वीक बौज्यूल दाउद धैं कौ, "तु जैबेर आपण भैनोंक कुशव-

बाद पुछये, और उनर लिजी दस किलो भुटी नाज और र्वाट लिबेर जा। और उनर सेनापतीक लिजी पनीरक दस टिककी लै ली जा। उं एलाह घाटि मिं पलिशितयोंक दगाड़ लड़ै करणई।"

यैक लिजी दाउद रात्ति उठौ, और वील भेड़-बकारों कैं ग्वावोंक पास छोड़िबेर, समान लिबेर बाँट लागि गोय। पड़ाव मिं पुजिबेर वील देखौ कि उ बखत इस्रायली फौज लड़ैक मैदानक तरफ जाणैछी, और सिपै लड़ैक नाँर लगूणाछी। इस्रायली और पलिशती द्विवै एक-दुसरक सामण कतार लगैबेर ठाँड़ है ग्याय। दाउद लै आपण समान कैं पड़ाव मिं चौकदारक पास धरिबेर उनर पछिल बे उ तरफ दौड़ौ। और वां पुजिबेर आपण भैनों कैं देखिबेर उनर कुशव-बाद पुछी।

जब दाउद आपण भैनोंक दगाड़ बात करणौछी, तब पलिशती फौजक पड़ाव बे गोलयत निकलिबेर भ्यार आ। और फिर उ रोजक चारि इस्रायलियों कैं चुनौती दिण लागौ। जब इस्रायली सिपैनॉल गोलयत कैं आपण सामण देखौ, तब उं सब वीक सामण बे भाजि ग्याय, किलैकि उं भौत डरि ग्याछी।

दाउदल आपण सामण ठाँड़ सिपैनॉं धैं पुछौ, "यौ बिदेशी को छु जो उ ज्यून परमेश्वरक फौज कैं ललकारणौ? जो यौ पलिशती कैं मारल, और इस्रायलियों कैं यौ शरम बे जितॉल, वीक दगाड़ कस बरताव करी जॉल?"

तब सिपैनॉल उकैं यौ जवाब दे, "जो मैस उकैं मारल, उकैं रॉज भौत धनवान बणैबेर आपणि चेलिक ब्या लै वीक दगाड़ करि द्यल। और यैक अलावा वीक खानदान कैं हरेक किसमॉक रकमों कैं लै माफ करि द्याल।" जब दाउद सिपैनॉंक दगाड़ बात करणौछी, तब वीक भै ऐलीयबल वीक बात सुणी। वील नराज हबेर दाउद धैं कौ, "तु यां किलै आछै? जो थ्वाड़ भेड़-बकार छी, उनुकैं कैक पास छोड़िबेर ऐ रैछै? मी तेरि ढिटाइ और तेरि मनकि बदमाशी कैं भली कैं जाणनू, तु यां लड़ै देखणक लिजी ऐ रौछै।" दाउदल कौ, "आँब मील के करौ? के मी बात लै नि करुं?" दाउद वीक पास बे मुड़िबेर दुसर सिपैनॉंक सामण ठाँड़ है गोय। वील उनुधैं लै वी सवाल पुछौ, और सब मैसॉल लै उकैं वी जवाब दे, जो वील पैलिवाँल मैसों बे सुण राँखछी।

जब शाउल कैं पत्त चलौ कि क्वे लौंड यस-यस पुछणौ, तब वील दाउद कैं बुलवा। तब दाउदल वां पुजिबेर शाउल धैं कौ, "हे महारॉज, तुमर मन यौ पलिशती मैसक कारणल निराश किलै हैरौ? मी तुमर सेवक वीक दगाड़ लड़ै करणक लिजी जूँल।"

शाउलल दाउद धैं कौ, "तु वीक दगाड़ लड़ै नि करि सकनै, किलैकि आजि तु लौंडै छै, और उ जवानी बे एक पक्क सिपै छु।" लेकिन दाउदल शाउल धैं कौ, "मी आपण बौज्यूक भेड़-बकॉरों कै चरूनु, और जब बाघ और भॉल ऐबेर उनुकै उठै ली जानी, तब मी उनर पिछ करिबेर उनुकै मारनू और उनर खाप बे उनुकै छुड़ैबेर ल्युनु। और अगर उं मुड़िबेर मी मिं हम्मल करनी, तब मी उनर जमज्याणिक बाँवों कै पकड़िबेर उनुकै चित्त मारि दिनु। मील बाघ-भॉल सबों कै मारि रॉखौ, और यौ बिदेशी लै इसिकै मारी जॉल, किलैकि यैल ज्यून परमेश्वर कै मानणी फौजकि बेईजती करि रॉखी। जो परमेश्वरल मिक्कै बाघ-भॉलोंक पन्ज बे बचाछी, उं मिक्कै यौ पलिशतीक हात बे लै बचाल।"

तब शाउलल उकै आपण कवच पैराई और वीक ख्वर मिं आपण पितवक टोप लै पैरा। फिर दाउदल आपण कमर मिं शाउलकि तलवार लै बादी, और यौ सब पैरिबेर हिटणक कोशिश करी। पर उ नि हिट सक, किलैकि उकै यौ हतियारोंक आदत नि छी। यैक लिजी दाउदल शाउल धैं कौ, "मी यौ सब पैरिबेर नि हिट सकन, मिक्कै इनेरि आदत न्है।" और वील उ सब खोलि देई।

तब दाउदल आपण जांठ हात मिं ले, और गाड़क किनार बे पांच नॉन गोल ढुड लिबेर उनुकै आपण झल्ल मिं धरि ले। और हात मिं आपण गोफन लिबेर पलिशती सिपैक नजिक पुजौ।

जब पलिशतील दाउद कै चा, तब उ वीक हसि उडुण लागौ, किलैकि उ उकै एक नॉन च्यलक अलावा और के नि समझणौछी। और वील उधैं कौ, "के मी कुकूर छूं, जो तु जांठ लिबेर ऐ रौछै?" और उ आपण दयाप्तोंक नाम लिबेर दाउद कै फिटकार दिण लागौ। वील कौ, "आ, म्यर पास आ, मी तुकै मारिबेर त्पर शिकार चील-काँवों और श्याव-कुकूरों कै खॉणक लिजी द्यूल।"

तब दाउदल उकै जवाब दे, "तु तलवार और भॉल लिबेर म्यर दगाड़ लड़ै करणक लिजी ऐ रौछै, लेकिन मी स्वर्गक सेनाओंक प्रभु, इसायली फौजोंक परमेश्वरक नामल, जनुकै त्वील चुनौती दी रॉखी, त्पर दगाड़ लड़ै करणक लिजी ऐ र्युं। आज प्रभु तुकै म्यर हात मिं सौप द्याल, और मी त्पर गव काटिबेर तुकै मारि द्यूल। आज मी तेरि और पलिशती सिपैनोंकि लाशों कै चील-काँवों और श्याव-कुकूरों कै खॉणक लिजी दी द्यूल, और इसिक धरतिक सब मैसों कै मालुम चल जॉल कि इसायलियोंक परमेश्वर आपण मैसोंकि हिफाजत करनी। और यांक सब मैसों कै लै मालुम चल जॉल कि

परमेश्वर तलवार और भॉलक जरियल नि बचून। यौ लड़ै प्रभु परमेश्वरकि छु और उं तुम पलिशितयों कै हमार हात मिं सौंप द्याल।"

जब उ पलिशती दाउदक तरफ उण लागौ, तब दाउद लै वीक तरफ दौड़ौ, और वील आपण झव्ल मिं हात खितौ और हातल एक ढुड निकालिबेर उकें गोफन मिं धरिबेर जोर-जोरल रिडै-रिडैबेर पलिशितयक बरमाँण मिं मारौ, जैल उ वीक कपाव मिं बुड़ गोय, और उ मुखक बल धड़ाम कै लफाई गोय। और दाउद दौड़बेर गो और वीकी तलवार निकालिबेर गव काटिबेर उकें मारि दे। इसिक दाउदल गोफन और नाँनू ढुडल पलिशती कै हरै दे, जबकि वीक पास तलवार लै नि छी।



दाउद गोलयत कै मारणौ

जब पलिशती सिपैनोंल देखौ कि गोलयत मारी गो, तब उं सब लै भाँजण लागीं। और इसायली फौजोंल लै लड़ैक नाँर लगैबेर गत और एक्रोन नगरों तलक पलिशितयोंक पिछ करौ। और घैल पलिशती सिपैनोंकि लाश गत और एक्रोन नगर तलक बाँट मिं बिछै देई।

एल जब दाउद पलिशती कै मारिबेर वापिस आ, तब शाउलल उधै पुछौ, "च्यला, तु कैक च्यल छै?" दाउदल उकें बता, "महारॉज, मी बैतलहम नगर मिं रुणी तुमर सेवक यिशैक च्यल छूं।"

और यौ दिनै शाउल दाउद कै आपण दगाड़ ली गो और उकें आपण घर नि जाण देय।

दाउद देखिबेर शाउलक जलन

(१ शमूएल १८:१-५, २७, २८, १९:११, १२, १८)

यौ घटनाक बाद शाउलक च्यल योनातन और दाउद मिं पक्कि दोस्ती है गई। और योनातन दाउद कै भौत प्रेम करण लागौ। वील दाउदक दगाड़ यौ वैद करौ कि मी हमेशा तलक त्यर दोस्त रूँल। यैक लिजी वील आपण कुर्त,

तलवार, कवच, कमर बन्द और धनुष उतारिबेर दाउद कै दी दे। किलैकि उ दाउद कै भौत प्रेम करछी।

यैक बाद शाउलल दाउद कै जां लै भेजौ, उ वांभे जितबेर आ। तब शाउलल उकै सिपैनोंक सैप बणै दे, और यौ बात सारि जनता कै भलि लागी। और शाउलल आपणि चेलि मीकलक ब्या दाउदक दगाड़ करि दे।

लेकिन जब शाउलल देखौ, कि परमेश्वर दाउदक दगाड़ छन, और आँब सबनक दगाड़ मेरि चेलि लै दाउद कै भौतै प्यार करुं, यैक लिजी उ दाउद कै देखिबेर खार-खाँण और भौत डरण लै लागौ। और वील दाउद कै मारणक कोशिश लै करी। वील एक रात दाउदक घर मिं द्वी मैस यौ कैबेर भेजीं, "तुम जस्सै उ भ्यार आल, उड़ै दिया।" लेकिन शाउलकि चेलि मीकल कै यौ बात पत्त लागी, और वील दाउद धैं कौ, "आज रात तुमुल आपुंके बचूण छु। अगर नि बचाला, तो भोव रात्ति तलक तुमुके मारि दी जॉल।" यौ कैबेर मीकलल दाउद कै खिड़किक बाँट कम्न बे भ्यार निकालि दे, और दाउद वांभे भाजिबेर रामा नगर मिं शमूएलक पास आ, और उकै उ सब बात बताई जो शाउलल वीक दगाड़ करौ। यैक बाद दाउद और शमूएल नायोत नगर मिं जैबेर रुण लागी।

परमेश्वर मिं दाउदक भरौस

(भजन संहिता ५७)

यैक बाद दाउदल यौ गीत गा,

हे म्यर परमेश्वर, मी मिं दया कर, मी मिं दया कर!

किलैकि म्यर प्राण तुमेरि शरण मिं छु। और जब तलक यौ मुशीबत दूर नि है जानि,

तब तलक मी तुमरै शरण मिं रूल।

मी सबों है महान परमेश्वर कै पुकारनू

जो म्यर लिजी सब सफल करो। और जो मैस मिंके कच्यलूं, परमेश्वर स्वर्ग बे मधत भेजिबेर मिंके बचाल और जो म्यर पिछ करनी, उं उनुके डांठॉल।

परमेश्वर मिंके आपण प्रेम और भरौस दिखाल।

मिंके बाघॉल घर राँखौ,

उं मिंके औतै न्यवणक लिजी तैय्यार छन। मी याँस मैसोंक बीच

मिं छूँ जनार दांत भॉल और तीर जाँस छन,
 और इनार शब्द धारदार तलवार जस छन।
 हे परमेश्वर, तुम स्वर्ग मिं आपण महिमा दिखाओ,
 और सॉर धरति मिं तुमर प्रताप फैल जाओ। हे परमेश्वर, म्यर
 दुश्मणोंल मिक्कें अलज्यूणक लिजी फांस लगै राँखी,
 मिक्कें भौतै डर लागणै। उनुल खड़ड़ म्यर लिजी खोदो,
 पर उमिं आफी छुटि पड़ी।
 हे परमेश्वर, म्यर मन शांत छु,
 मी गीत गैबेर तुमेरि महिमा करुल। बिज, ओ म्यर प्राण, तु बिज,
 बाँज, ओ बीणा और सितार, बाँज। रातै हबेर पैली लै मी गीत
 गान।
 हे म्यर परमेश्वर, मी सब मैसोंक बीच
 और देश-देशोंक सामण तुमर धन्यवाद करुल, और राज-राज्योंक
 बीच तुमेरि महिमा करणक लिजी गीत गान।
 किलैकि तुमर प्रेम स्वर्ग तलक छु, और सच्चाई अगाश-मण्डल
 तलक महान छु।"
 हे परमेश्वर आपण महिमा अगाश मिं दिखाओ,
 और सॉर धरति मिं लै फैलै दियो!

दाउद शाउल कै नि मारन

(? शमूएल २४:१-२२)

यैक थ्वाड़ बखत बाद जब शाउल पलिशतियोंक पिछ करिबेर वापिस
 आ, तब उकैँ यौ खबर मिली कि दाउद एनगदीक रेगिस्तान मिं छु। यौ
 सुणिबेर उ तीन हजार छांटी सिपैनोंक दगाड़ दाउदक पिछ करणक लिजी वां
 गो। वां घुमि-घुमिबेर शाउल झाड़-पिशाब करणक लिजी एक गुफा मिं गो,
 जां दाउद और वीक दगडु लुक राछी। शाउल कैँ वां यकलै देखिबेर दाउदक
 दगडुवोंल दाउद धैँ कौ, "सुण, आजै उ दिन छु, जैक बारि मिं परमेश्वरल
 तुधैँ कैँ राँखछी, कि मी त्यार दुश्मणों कैँ त्यर हात मिं करि द्यूँल, और जस
 तु चालै वीक दगाड़ करि सकछै।" तब दाउदल चुप-चाप शाउलक पास
 जैबेर वीक कुर्तक टुक काटि ले।

लेकिन यैक बाद उ सोचण लागौ, "मील रॉजक दगाड़ यस नि करण
 चैँछी।" यैक लिजी दाउदल आपण दगडुवों धैँ कौ, "प्रभु परमेश्वर मिक्कें यौ

काम करण बे रोको कि मी आपण मालिकक दगाड़ यस बर्ताव करुं। मी प्रभुक अभिषिक्त रॉज मिं आपण हात नि उठूं। किलैकि शाउल लै परमेश्वरक अभिषिक्त रॉज छु।" यौ सब कैबेर दाउदल आपण दगडुवों कै समझा, कि उं शाउलक खिलाफ मिं के नि करो।

तब शाउल जकै यौ सब बातोंक बारि मिं के मालुम नि चल, उ उठिबेर वांबे आपण बॉट न्है गोय। फिर दाउद गुफा बे भ्यार आ, और शाउल कै दूर बे धात लगैबेर कौ, "ओ, म्यर मालिक रॉज!" यौ सुणिबेर शाउलल पछिल कै चा, और दाउदल चौड़ हबेर उकै पैलाग करिबेर कौ, "जो मैस कूनी कि दाउद तुमर नुकसान करण चां, तुम उनेरि बात किलै सुणछा? यौ द्यखो, मील तुमर कुर्तक टुक काटि रॉखौ, पर मील तुमुकै नि मार। ऑब तुम आपण ऑखोंल देखि लियो कि म्यर मन मिं तुमर लिजी बैर और न पाप छु, फिर लै तुम मिंकै चित्त मारणक लिजी चाणाछा। लेकिन मील तुमर खिलाफ के पाप नि करि रॉख! यैक लिजी परमेश्वर सब बातों कै देखिबेर म्यर और तुमर बीच न्याय करो, और म्यर तरफ बे तुमर दगाड़ लड़ो और मिंकै तुमर हात बे बचाओ।"

तब शाउलल कौ, "ओ, म्यर च्यल दाउद, के यौ तेरि अवाज छा?" यौ कैबेर शाउल जोर-जोरल डाड़ मारण लागौ। और दाउद धैं कौ, "तु मी हबेर जादे धर्मी छै, त्वील तो म्यर दगाड़ भलै करौ, जबकि मील त्यर दगाड़ भल नि कर। आज त्वील म्यर दगाड़ भल बरताव करौ। परमेश्वरल तो आज मिंकै त्यर हात मिं करि हैछी, लेकिन त्वील मिंकै नि मार। भला क्वे आपण दुश्मण कै पैबेर ठिक-ठाक जाण दिंछा? यैक लिजी जे त्वील म्यर लिजी करौ, परमेश्वर त्यर भल करॉल। और ऑब मी जाण गोयूं कि तु पक्क रॉज बणलै। इसायलक पुर राज त्यर हात मिं ऐ जाँल। ऑब म्यर दगाड़ परमेश्वरक कसम खा, कि तु म्यर बाद म्यर वंशजों कै खतम नि करलै!"

तब दाउदल शाउलक दगाड़ यौ कसम खै। वीक बाद शाउल आपण घर वापिस आ, और दाउद आपण दगडुवोंक दगाड़ वांबे न्है गोय।

शाउलकि मौत

(१ शमूएल २६:१, ३१:१-१३)

यैक थ्वाड़ बखत बाद पलिशितयोंल इस्रायलियों मिं हम्ल करणक लिजी अपेक नामक जाँग मिं आपण सिपैनों कै जाँम करौ। तब शाउल इस्रायलियों कै जाँम करिबेर वां आ, लेकिन पलिशितयोंल उनुकै हरै दे, और इस्रायलियोंक सेना कै वांबे भॉजण पड़ौ। लेकिन पलिशितयोंल उनर पिछ

करिबेर शाउलक तीन च्यालों कै मारि डॉलौ, और शाउल कै घैल करि दे।

तब शाउलल आपण ढाल ली जाणिवाँल धै कौ, "आपण तलवार निकालिबेर म्यर आर-पार करि दे, कै यस नि हो कि यौ परमेश्वर कै नि मानणिवाँल मैस ऐबेर मेरि बेईजती करो और मिक्केँ मारो।" लेकिन वील यस नि कर, किलैकि उ भौत डरि रौछी। यैक लिजी शाउलल आपण कमर बे तलवार निकालिबेर आपुँकै घोपि दे।

जब ढाल ली जाणिवाँल यौ देखौ कि शाउल मरि गो, वील लै तलवार निकालिबेर आपुँकै घोपिबेर वीक दगाड़ मरि गोय। इसिक यौ दिनै शाउल, वीक च्याल, वीक ढाल ली जाणिवाँल और भौतै सिपै लै मरि ग्याय।

जब वां रुणी इसायलियोंल देखौ, कि शाउल और वीक च्याल मारी गई, तब उं आपण नगरों कै छोड़िबेर भाजि ग्याय। और पलिशती ऐबेर उनार घरों मिं रुण लागीं।

दुसर दिन जब पलिशती मरियोंक माल जॉम करणक लिजी आई, तब उनुल शाउल और वीक च्यालों कै मरी पा। उनुल शाउलक ख्वर काटिबेर पुर पलिशतियोंक देश मिं यौ खुशीक खबर फैलै कि शाउल मरि गो। और उनुल शाउलक हथियारों कै आपण द्यप्तक मंदिर मिं धरौ, और वीक लाश कै बेतशान नगरकि दिवाल मिं लटकै दे।

जब याबेश-गिलाद नगराँक मैसौल सुणौ कि पलिशतियोंल शाउलक दगाड़ के करौ, ¹ तब उनार ताकतबर मैस रात भर हिटिबेर शाउल और वीक च्यालोंक लाश कै दिवाल बे उतारिबेर याबेश लिबेर आई। और उनुल यां इनुकै जलैबेर इनार हड़िकों कै याबेश मिं दफनै दे। यैक बाद उनुल सात दिन तलक इनर लिजी शोक करिबेर बर्त धरौ।

दाउद शाउलक लिजी शोक मनुण

(२ शमूएल १:१-१६)

यौ बखत दाउद सिक्लग मिं छी। तब एक मैस शाउल रॉजक ड्यार बे भाजिबेर दाउदक पास आ। वीक लुकुड़ फाटी और ख्वर मिं छारूण खिती छी। वील दाउदक खुटों मिं चौड़ हबेर उकै पैलाग करौ। तब दाउदल उधै पुछौ, "तु कांबे ऐ रौछै?" वील जबाब दे, "मी इसायलियोंक ड्यार बे बचिबेर

¹ शाउल रॉजल पलिशतियोंक दगाड़ लड़े करिबेर याबेश-गिलाद नगर कै अम्मोनी रॉज बे आजाद कराछी। और यौ बात कै याबेश-गिलादाँक मैस नि भुल राछी।

ऐ रयूं।" तब दाउदल पुछौ, "वांक के हाल छन, मिक्कैं बताओ?" तब वील बता, "सिपै लड़ै बे भाजि गई, भौत सिपै मारी गई। और शाउल और वीक च्यल योनातन लै मारी गई।"

यौ सुणिबेर दाउदल उधैं कौ, "तु कसिक जाणछै कि शाउल और वीक च्यल योनातन लै मारी गई?" तब वील कौ, "उ बखत इत्तफाकल मी लै गिलबे मिं छी, मील देखौ कि शाउल आपण भॉलक सहारल ठाँड़ है रौ, और पलिशती सेना वीक पछिन पड़ि रै। वील मिक्कैं देखिबेर धात लगैबेर बुला, और जब मी वीक सामण गोयूं, तब वील मिधैं पुछौ, "तु को छै?" मील कौ, "मी अमालेकी छूं।" यैक बाद वील मिधैं कौ, "किरपा करिबेर म्यर सामण ठाँड़ हो और मिक्कैं मारि दे। किलैकि म्यर प्राण आइ तलक अटकी छन, और मी पीड़ल तड़पणयूं।" यैक लिजी मील वीक सामण ठाँड़ हबेर उकैं मारि दे। किलैकि मी जाणछी, कि उ भी मिं छुटणक बाद ज्यून नि बचल। यैक लिजी मील वीक ख्वर बे मुकुट और हात बे धागुल निकालिबेर यां आपण प्रभुक सामण लिबेर ऐ रयूं।" ²

यौ सुणिबेर दाउदल दुःखी हबेर आपण लुकुड़ फाड़िबेर उधैं पुछौ, "तु कांक रुणी छै?" वील जबाब दे, "मी तो एक परदेशि छूं, एक अमालेकी, लेकिन तुमर देश मिं रुणिवाँल।" दाउदल उधैं कौ, "यौ कसि बात छु, कि तु परमेश्वरक अभिषिक्त कैं मारणक लिजी हात उठूण मिं नि डरै?"

यैक बाद दाउदल आपण सिपैनों मिंबे एक कैं बुलैबेर कौ, "जा, यकैं मारि दे।" और दाउदल अमालेकी धैं कौ, "त्यर खून त्यरै ख्वर मिं छु, किलैकि त्यर मुखल त्यर खिलाफ मिं गवाही दे, कि त्वील परमेश्वरक अभिषिक्त कैं मारि डॉलौ।" तब सिपैल उकैं इसिक मारौ कि उ मरि गोय।

यैक बाद दाउद और जतुक मैस लै वां छी उनुल शोक मना, किलैकि शाउल, वीक च्याल और भौतै इस्रायली मैस तलवारल मारी गयाछी।

दाउद रॉज बणुं

(२ शमूएल २:४, ५:१, १ इतिहास ३:१, ३)

यैक बाद दाउद हेब्रोन मिं गो और तब वां यहूदा बे भौत मैस आई, और उनुल दाउद कैं यहूदा कुलक रॉज बणूणक लिजी अभिषेक करौ। यैक बाद दाउदल वां साढ़े सात साल तलक राज करौ, और यां दाउदॉक छै च्याल पैद हई।

² उ मैस जाणछी कि शाउल और दाउदक बीच मिं दोस्ती नि छी, और उ सोचछी कि दाउद शाउलक मौतक बारि मिं सुणिबेर खुशि हवल और मिक्कैं इनाम द्यल। यैक लिजी उ यो झुट बुलाणौ।

वीक बाद दुसॉर इस्रायली दलाँक मैसॉल लै दाउदक पास ऐबेर कौ कि तुम हमर दगाड़ लै राज करो। और दाउदल यरुशलेम जैबेर सॉर इस्रायलियोंक रॉज बणिबेर तैंतीस साल तलक उनर दगाड़ राज करौ। और वां दाउदाँक और भौत दुसॉर नॉनतिन लै पैद हई।

दाउद परमेश्वरक भवन बणूण चां

(२ शमूएल ७:२-१७)

एक दिन दाउद रॉजल परमेश्वरक सेवक नातान धैं कौ, "देखो, मी तो महल मिं रूनु, लेकिन परमेश्वरक वैदक संदूक तम्बू मिं छन।" नातानल रॉज धैं कौ, "जस तुमर मन मिं छु, तुम उस करो। किलैकि परमेश्वर तुमर दगाड़ छन।"

लेकिन यौ रातै प्रभु परमेश्वरल नातान धैं कौ, "तु जैबेर म्यर सेवक दाउद धैं कये, कि प्रभु परमेश्वर यस कूनी कि तु म्यर रुणक लिजी भवन बणूणिवॉल नि ह्वलै। जदिन बे मील इस्रायलियों कैं मिस्र देश बे भ्यार निकालौ, उ दिन बे मी भवन मिं नि रय, मी तम्बू मिं घुमनै रंछी। और जां-जां मी इस्रायलियोंक दगाड़ रयूं, और जनुकैं मील उनर अधिकारी बणा, के मील उनुधैं यस कौछा, कि तुमुल म्यर लिजी सुन्दर भवन किलै नि बणाय?

यैक लिजी ऑब तु म्यर सेवक दाउद धैं कये, "प्रभु परमेश्वर यस कूं, मील तुकैं भेड़-बकारोंक पछिन-पछिन फैरीन बे निकालौ, कि तुकैं आपण मैस इस्रायलियोंक रॉज बणूं।

और जां कैं लै तु गोछै, वां मील त्यर सामण बे दुश्मणों कैं नांश करि दे। लेकिन मी यौ हबेर बड़िबेर लै करुल। मी त्यर नाम कैं धरतिक सब ठुल-ठुल मैसोंक चारि ठुल करुल। और जब त्यार दिन पुर है जॉल, तब मी त्यर च्यल कैं ठाँड़ करिबेर वीक राज कैं मजबूत बणूल। और वी म्यर लिजी भवन बणाल, और मी वीक राज कैं हमेशा-हमेशाक लिजी बणै द्यूल। मी वीक बौजू हूल, और उ म्यर च्यल ह्वल। अगर उ पाप करल, तब मी उकैं सजा दिबेर सुधारुल। लेकिन मेरि दया हमेशा उमिं रौलि, जस मील शाउल मिंबे आपण दया हटैबेर उकैं त्यर सामण बे लै हटै दे, उस नि करुं। त्यर परिवार और राज हमेशा म्यर सामण रौल।"

तब नातानल यौ सब बात दाउद रॉज कैं बतै।

दाउदक बिनती

(२ शमूएल ७:१८-२६)

यौ सब सुणिबेर दाउद रॉज परमेश्वरक तम्बू मिं जैबेर परमेश्वर धैं यौ प्रार्थना करण लागौ, "हे प्रभु परमेश्वर, मी को छू, और म्यर परिवार के छु, जो तुम मिक्कें यां तलक लिबेर ऐ राछा? लेकिन ऐल तुम हमर लिजी और लै जादे भल काम करणिवाँल छा! किलैकि तुमुल आपण सेवकक परिवारक अधिलक बारि मिं लै कै है। तुम कतुक महान छा! तुमर जस क्वे न्हैं। और धरति मिं तुमार मैस इस्रायलियोंक बराबेरि और क्वे दुसेरि जाति न्हैं जनुकें छुडूणक लिजी तुम आफी ग्याछा, कि उनुकें आपण जनता बणओं। तुमुल उनुकें मिस बे छुडैबेर अलग-अलग जातियों और उनार द्याप्तों कैं हरैबेर यां ल्याछा। तुमेरि महिमा पुर धरति मिं फैली। तुमुल इस्रायलियों कैं हमेशाक लिजी आपण मैस बणा, और तुम हमेशाक लिजी इनर परमेश्वर रौला।

यैक लिजी, हे परमेश्वर, जो बात तुमुल म्यर परिवारक लिजी कैं राँखछी, उकें पुर करिया। जैल तुमर नाम हमेशाक लिजी महान करी जाओ, कि तुम इस्रायलियोंक परमेश्वर छा, और तुमर दास दाउदक घरान हमेशा तुमर सामण रओ। हे परमेश्वर, तुमुल कौ, "मी तुबे एक राजबंश बणूल," यैक लिजी मिक्कें तुमर सामण प्रार्थना करणक हिम्मत है। हे परमेश्वर, तुम महान परमेश्वर छा, और तुमार बचन साँचि छन, तुमुल आपण दास धैं भलाइक वैद करि राँखौ। यैक लिजी आँब म्यर परिवार कैं आशीश दिणक लिजी खुशी होव कि उ तुमर सामण हमेशा रओ।"

दाउदक पाप

(२ शमूएल ११:१-२७)

सालक शुरु मिं जब रॉज लड़णक लिजी जाँछी, उ बखत दाउद रॉजल योआब नामक सैप कैं आपण सिपैनोंक दगाड़ भेजि दे। इनुल जैबेर अम्मोनियों कैं हरैबेर रब्बा नगर कैं चारो तरफ बे घेर ले। पर दाउद यरुशलेम मिं छी।

एक दिन जब ब्याव बखत दाउद रॉज आपण बिसाण बे उठिबेर महलक पाँख मिं घुमणौछी, तब वील एक भौतै बान स्यैणि कैं क्वे दुसर घरक पाँख मिं नाण देखौ। तब दाउदल आपण नौकर कैं भेजिबेर उ स्यैणिक पत्त लगावा कि उ को छु? तब उकें पत्त चलौ कि उ उरिय्याहक स्यैणि बतशेबा छु। और यैक बैग दाउदक सेना मिं सिपै छु।

तब दाउदल नौकर कै भेजिबेर उ स्यैणि कै आपण महल मिं बुलवा। जब उ वीक पास ऐ, तब दाउदल उकै आपण दगाड़ पड़ा। यैक बाद उ आपण घर वापिस गे।

यैक थ्वाड़ बखत बाद जब उ स्यैणि कै पत्त चलौ कि मी अड-भारि छूं, तब वील दाउदक लिजी जबाब भेजौ, कि हमर नॉनतिन हुणी छु।

यौ सुणिबेर दाउदल आपण सेनाक सैप योआबक लिजी जबाब भेजौ, कि उरिय्याह कै म्यर पास भेज। यैक लिजी वील उरिय्याह कै दाउदक पास भेजौ। जब उरिय्याह दाउदक पास आ, तब दाउदल उरिय्याह धैं पुछौ, "लडैक के हाल-समाचार छन?" फिर उधैं कौ, "आपण घर जैबेर अराम कर।" उरिय्याह महल बे भ्यार आ, और दाउदल वीक लिजी पछिल बे इनाम लै भेजौ। लेकिन उरिय्याह महलक द्वार लै चौकदारोंक दगाड़ पड़ि गोय, और आपण घर नि गोय।

दुसर दिन जब नौकरोंल दाउद रॉज कै बता कि उरिय्याह आपण घर नि गोय, तब वील उरिय्याह कै बुलवैबेर उधैं कौ, "के तु सफर करिबेर नि ऐ रयै? तु आपण घर किलै नि गोयै?" तब उरिय्याहल दाउद धैं कौ, "इस्त्रायली सिपै वैदक संदूक लिबेर लडै मिं जै रई, और म्यर मालिक योआब और वीक सेना खुल मैदान मिं पड़ि रई। के मी खॉण-पिणक लिजी और आपण स्यैणिक दगाड़ सितणक लिजी आपण घर जां? परमेश्वरक और तुमेरि कसम, मी यस नि करि सकन!"

फिर दाउदल उरिय्याह धैं कौ, "आज लै तु यैं रौ, भोव मी तुकै विदा करुंल।" यैक लिजी उरिय्याह द्वी दिन तलक आय यरुशलेम मिं रुकौ।

दाउदल ब्याव बखत उकै बुलवैबेर वीक दगाड़ खा-पी। जब उकै नश लागि गोय तब दाउदल उकै घर भेजौ। लेकिन उरिय्याह आज लै आपण घर नि गोय और महलक भ्यार सित गोय।

रात्ति हुण पर दाउदल योआबक लिजी एक चिट्ठी लिखी, और उ चिट्ठी उरिय्याहक हात भेजी। दाउदल यौ चिट्ठी मिं लिख रॉखछी, "उरिय्याह कै घमासान लडै मिं सबों हबेर मुश्किलवॉल जॉग मिं तैनात करिये, और आपण पछिल है जाये, जैल उ घैल हबेर मरि जॉल।"

तब योआबल उरिय्याह कै लड़णक लिजी उ जॉग मिं लगा, जां सबों है भयंकर मार-काट चल रैछी। फिर अम्मोनी सिपैनोंल नगर बे भ्यार ऐबेर इस्त्रायलियोंक दगाड़ लडै शुरू करी, जमिं दाउदाक थ्वाड़ सिपै और उरिय्याह लै मारी गोय। तब योआबल लडैक खबर दाउदक लिजी भेजी। योआबल

जुबबी धैं कौ, "तु लडैक पुर घटना रॉज कै बताये, अगर रॉज कै रीश आलि और उ तुधैं पुछॉल, कि के तुम नि जाणछिया कि उं दिवाल बे तीर चलूनी? तुम दिवालक इदुक नजिक किलै ग्याछा? तब तु कये, "तुमर सेवक उरिय्याह लै मरि गो।"

तब जुबबियल दाउद रॉजक पास ऐबेर यौ सब बात बतै जो योआबल बतूणक लिजी कै रॉखछी। वील दाउद रॉज धैं कौ, "अम्मोनी फौज हमुमिं हम्मल करणैछी और उं हमर पछिल मैदान तलक आई। लेकिन हमुल लै उनुकै उनरै नगरक द्वार तलक खिदाड़ि दे। तब अम्मोनियोल त्यार सेवकों मिं दिवाल बे तीर मारी, और तुमार थ्वाड़ सेवक मारी गई, और तुमर सेवक उरिय्याह लै मरि गो।"

यौ सुणिबेर दाउदल उधैं कौ, "तु योआब धैं यस कये, कि यौ बातल उदास नि हो। किलैकि तलवार जस एक मैस कै उसै दुसर कै लै नेई लीं। यैक लिजी नगरक खिलाफ आपण लडै आइ तेज करो और उ नगर कै नांश करि दियो, और इसिक तु उकै हिम्मत दिये।"

यैक बाद जब उरिय्याहक स्यैणि बतशेबाल सुणौ, कि वीक बैग मरि गो, तब वील आपण आदिमक लिजी शोक करौ। शोक पुर हुणक बाद दाउदल उकै आपण महल मिं बुलवा, और उ वीक स्यैणि है गई। फिर वील वीक च्यल कै जनम दे।

लेकिन जो काम दाउदल करि रॉखछी, उ प्रभु परमेश्वरक नजर मिं भौत खराब छी।

दाउदकि सजा

(२ शमूएल १२:१-१३)

यैक लिजी परमेश्वरल आपण सेवक नातान कै दाउदक पास भेजौ। वील दाउद धैं कौ, "सुणो, क्वे नगर मिं द्वी मैस छी। एक मैस सेठ छी और दुसर गरीब छी। सेठक पास भौत भेड़-बकॉर और गोरु-बाँछ छी, पर गरीबक पास एक नानू-नॉन भेड़क पाँठक अलावा और के नि छी। यौ भेड़ यैक नॉनतिनोकै दगाड़ बढ़ौ। उ वीक भान बे खाँछी और वीक गिलास बे पिँछी, वीक काखि मिं शितछी और उ वीक चेलिक चारि छी।

एक दिन सेठक घर मिं एक पौण आ, लेकिन वील वीक लिजी आपण भेड़-बकॉरों मिंबे एक लै नि काँटण चाय। पर उ गरीब मैसक भेड़क पाँठ कै जबरदस्ती ल्यैबेर उकै उ पौणक लिजी काटिबेर खाँण बणा।"

यौ सुणिबेर दाउद कैं भौतै रीश ऐ। वील नातान धैं कौ, "प्रभु परमेश्वरक कसम, जो मैसल यौ करौ, उ जरूड मौतक सजाक लैक छु। उकैं वीक चौगुण भरण पड़ल। किलैकि वील यौ गलत काम करौ और उकैं थ्वाड़ लै दया नि आइ!"

तब नातानल दाउद धैं कौ, "त्वी तो उ मैस छै! इसायलक प्रभु परमेश्वर यस कूनी, मील इसायलक रॉज हुणक लिजी त्पर अभिषेक करौ, और मीलै शाउलक हात बे तुकैं छुड़ा। मील त्पर मालिकक राज और वीक सब कुछ तुकैं दे, और इसायल, यहूदाक पुर घरान लै दे। अगर यौ सब कम छी, तो त्वील मिधैं किलै नि कौय, मी तुकैं आइ दी दिंछी। त्वील प्रभु परमेश्वरक नजर मिं उ काम किलै करौ जो खराब छी? त्वील उरिय्याह कैं अम्मोनियोंक तलवारल मरवैबेर वीक स्यैणि कैं आपणि स्यैणि बणा! यैक लिजी ऑब त्पर घरान बे तलवार कभै दूर नि हो। किलैकि त्वील म्पर नीमों कैं टोड़ है, और उरिय्याहकि स्यैणि कैं आपणि स्यैणि बणा। यैक लिजी प्रभु परमेश्वर यस कूनी, "दयख, मी त्परै घर बे त्पर खिलाफ बुराइ पैद करवूल, और मी यौ लै करुंल कि त्पार आंखोंक सामण त्पार स्यैणियों कैं लिबेर एक दुसर मैस कैं द्यूल। और उ दिन-दोफर मिं त्पार स्यैणियोंक दगाड़ सितल। त्वील यौ काम चुपचाप करौ, लेकिन मी यौ पुर इसायलक सामण करुंल!"

यौ सब सुणिबेर दाउदल नातान धैं कौ, "मील प्रभु परमेश्वरक खिलाफ भौत भयंकर पाप करि रॉखौ!"

दाउदक पछताव

(भजन संहिता ५१:१७)

तब दाउदल भौत दुःखी हबेर यौ प्रार्थना करी,

"हे परमेश्वर, आपण किरपाल मि पर दया करिबेर

म्यार पापों कैं माफ करि दियो। म्यार हरेक किसमोंक कसूरों कैं सुधारि दियो,

मिकैं शुद्ध करि दियो। किलैकि मी आपण पापों कैं माननू,

उं हमेशा म्यर सामण रुनी।

मील तुमरै खिलाफ पाप करि रॉखौ

जो तुमर नजर मिं खराब छु, वी मील करि रॉखौ

म्यर लिजी तुमर न्याय सही छु। दयखो, मी तो जन्म बटी पापि छूं,

बल्किन जब पैद लै नि है रौछी, तब बटी।

हे परमेश्वर, तुम तो सांचि कै देखिबेर खुशि हुंछा,
 तुम मिक्कै बुद्धिक बात सिखाला। हे परमेश्वर, मिक्कै शुद्ध करो, कि
 मी पवित्र है जूं,
 मिक्कै धोओ, कि मी हियुं हबेर जादे सफेद बणि जूं।
 मिक्कै खुशि और आनंदित करनी बात सुणाओ,
 तुमुल मिक्कै टोड़ रॉखौ, आँब मिक्कै मगन करो। म्यार पापों कै माफ
 करिबेर उनुकै दूर करि दियो,
 और म्यर अधर्म कै खतम करि दियो।
 हे परमेश्वर, म्यर आत्मा कै शुद्ध करिबेर
 मिक्कै दुबार यस बणाओ कि मी तुमेरि बातों कै पुर मनल मानुं।
 मिक्कै आपण सामण बे नि निकालया,
 और आपण पवित्र आत्मा कै मिबे अलग नि करिया।
 हे परमेश्वर, मिक्कै फिर आपण मुक्तिक खुशी दियो,
 जैल म्यर पुर मन तुमर तरफ हो तब मी बदमाशों कै लै तुमर बाँट
 बतूल,
 जैल पापी तुमर तरफ आल।
 हे म्यर बचूणिवॉल परमेश्वर, मिक्कै खूनक दोष बे छुड़ै लिये,
 जैल मी खुशि हबेर तुमर भलाइक गीत गान। हे परमेश्वर, म्यार
 ल्युणों कै खोलि दियो,
 जैल मी तुमेरि बड़ाई करि सकुं।
 किलैकि तुम क्वे ले बलिदान देखि खुशि नि हुंछा,
 नतेरि मी वी चढूछी। और तुम आँग मिं बलिदान चढूणल ले खुशि
 नि हुंछा।
 तुम निराश और हतास मनो कै अपनूछा, यै तुमर लिजी सांचि भेट
 छु।

दाउदक च्यलकि मौत

(२ शमूएल १२:१३-२५)

तब नातानल दाउद थैं कौ, "तु नि मरलै, परमेश्वरल त्यार पाप माफ करि
 हैली। फिर लै त्वील यौ काम करिबेर प्रभु परमेश्वरक दुश्मणों कै बकणक
 मौक दी है, यैक लिजी त्यर यौ च्यल जो पैद है रौ, जरूड़ मरि जाँल।"

फिर परमेश्वरक हात उ भौ मिं पड़ौ जकै उरिय्याक विध्वाल दाउद बे जनम दे। यैक लिजी उ जादे रोगिल है गोय। और दाउदल प्रभु परमेश्वर धैं यौ भौक लिजी बिनती और बर्त लै करी, और उ रात-भर भिं मिं पड़ि रूँछी। वीक दरबारी उकैं उठूणक लिजी वीक सामण आई, पर उ नि उठ, और नै वील खॉण खाय।

यैक सात दिन बाद जब भौ मरि गोय, तब दाउदक दरबारी यौ बतूण मिं डरणाछी कि भौ मरि गो, किलैकि उं सोचणाछी, "जब भौ ज्यून छी और हमुल यैक दगाड़ बात करी, यैल हमेरि बात नि सुणि। आँब हम कसिक बतूण कि भौ मरि गो? यौ सुणिबेर तो उ पक्क बौई जॉल!"

जब दाउदल आपण सेवकों कैं आपस मिं खुशुर-बुशुर करण देखौ, तब वील उनुधैं कौ, "के भौ मरि गोछा?" उनुल कौ, "होई।"

तब दाउदल भिं मिंबे उठिबेर नै ध्वै तेल लगैबेर लुकुड़ बदेई। फिर परमेश्वरक तम्बूक पास मिं जैबेर अराधना करी। और आपण घर ऐबेर वील खॉण खा।

यौ देखिबेर दरबारियोंल उधैं पुछौ, "तुमुल यौ के करौ? जब तलक भौ ज्यून छी, तब तुमुल बर्त करिबेर डाड़ मारी। लेकिन जब उ मरि गो, तब तुमुल उठिबेर खॉण खा!" तब दाउदल कौ, "मील बर्त करिबेर डाड़ मारी, किलैकि मी सोचणौछी शायद प्रभु परमेश्वर मीमिं दया करि दियो जैल उ बचि सको। आँब तो उ मरि गो, मी बर्त किलै करू? के मी उकैं लौटैबेर ल्यै सकनू? मी एक दिन वीक पास जूँल पर उ म्यर पास नि ऐ सकन।"

फिर दाउदल आपण स्यैणि बेतशेबा कैं तसल्ली दे। उ दुबार अड-भारि है, और वील फिर एक च्यल कैं जनम दे। दाउदल यैक नाम सुलेमान धरौ। प्रभु परमेश्वरल लै यैक दगाड़ प्यार करौ, और उनुल नातानक हात दाउदक लिजी यौ जबाब भैजौ कि तु यौ भौक नाम यदीधाह लै धरिये। (जैक मतलब छु "परमेश्वर यकैं प्रेम करनी।")

अबशालोम रॉज बणण चां

(२ शमूएल १५:१-१६)

यैक थ्वाड़ सालोंक बाद यस हौ, कि दाउदक एक दुसर च्यल अबशालोमल आपण लिजी एक रथ, घ्वाड़ और पचास मैसों कैं आपण अधिल हिटणक लिजी धरीं। और उ रात्ति-ब्याव उठिबेर नगरक द्वारक बाँट मिं ठाँड़ है जांछी। और जब-जब मैस न्यायक लिजी रॉजक पास उंछी, तब

अबशालोम उनुकै बुलैबेर पुछ्छी कि तु कांबे आछै? और उं उकै बतूछी कि मी फल्याण-फल्याण जांग बे ऐ रयू, और यौ-यौ काम करूणक लिजी आयूं। तब अबशालोम उनुधैं कूछ्छी, "सुणो, तुमर दाव सांचि छु, पर रॉजक तरफ बे तुमर सुणणी क्वे न्हैं। काश मी तुमर न्याय करणी हुंन, तब मी तुमर सही-सही न्याय करछी!" और जब क्वे मैस अबशालोम कै पैलाग करणक लिजी उंछी, तब अबशालोम उनुकै अडाव खितछी। इस्रायलॉक जदुक मैस न्यायक लिजी रॉजक पास उंछी, उ सबोंक दगाड़ यस्सै करछी। इसिक इस्रायली मैस अबशालोम कै भल मानण लागीं।

यैक चार साल पुर हुणक आखिरी दिनों मिं अबशालोमल रॉज धैं कौ, "किरपा करिबेर मिंकै जाण दियो, कि एक जो परण मील प्रभु परमेश्वर धैं करि रॉखौ, उकै हेब्रोन मिं जैबेर पुर करूं।" यौ बात सुणिबेर रॉजल उधैं कौ, "तु भली कै जा।"

यैक लिजी अबशालोम हेब्रोन गो। तब वांबे वील इस्रायलॉक सब कुलों मिं आपण जासूस यैक लिजी भेजीं कि उं यस कओ, "जसै तुम भुकौरिक अवाज सुणला, उसै जोर-जोरल कया कि अबशालोम हेब्रोन मिं रॉज बणि गो!" फिर यरुशलेम बे आबशालोमलक दगाड़ द्वी सौ बैग न्यूत मिं गई। उं तो भल मनल जै राछी और उं के भेद लै नि जाणछी।

अबशालोमल दाउद कै राय दिणी अहीतोपेल नामक मैस कै लै बुलवा कि उ यां आओ। और आब यौ मशौद मजबूत हुनै गो, किलैकि आब अबशालोमॉक दगाडुवोंक गिनती भौत बढ़णैछी।

फिर एक दूतल दाउदक पास ऐबेर कौ, "इस्रायलियोंक मन अबशालोमक दगाड़ मिलि गो।" तब दाउदल आपण सब सैपों धैं कौ, "हितो, यांबे भाजि जानू, नतेरि अबशालोमक हातों बे हम क्वे लै नि बचो। हितो, जल्दी करो, कै यस नि हो कि उं यां ऐ पुजो और पुर नगर कै आपण हम्मल खतम करि दियो।" यौ सुणिबेर उं सबोंल दाउद धैं कौ, "रॉजज्यू, जस तुम कूछा उस करणक लिजी हम तुमार सब सेवक तैय्यार छूं।"

आखिरकार रॉज दाउद और वीक सब मैस वांबे बाँट लागि गयाय। बस रॉजल आपण महलक देखभाल करणक लिजी आपण दस रखैलों कै वां छोड़ौ।

आपण बौज्यूक रखैलियोंक दगाड़ अबशालोम

(२ शमूएल १६:१५-२२)

वीक बाद अबशालोम आपण सेनाक दगाड़ यरुशलेम में आ। तब अबशालोमल दाउद केँ राय दिणी अहीतोपेल धैँ पुछौ, "ऑब मी के करनू?" अहीतोपेलल कौ, "जो रखैलियों केँ त्यर बौज्यू यौ महलक देख-भाल करणक लिजी छोड़ि गो, तु उनर पास जा। तब सब मैसों केँ पत्त लागल कि त्वील आपुंकेँ रॉज बणै है।" यैक लिजी अबशालोमल महलक पॉख में एक तम्बू लगवा, और सब इस्रायलियोंक सामण उ आपण बौज्यूक रखैलियोंक दगाड़ सितौ। यस नातानक जरियल परमेश्वरक बचन दाउदक बारि में पुर हौ कि त्वील यौ पाप चुपचाप करौ, लेकिन मी त्यर सजा पुर इस्रायलक सामण करुंल।

अबशालोमक दगाड़ लड़ै

(२ शमूएल १७:२७-२९, १८:१-१७)

दाउद और वीक दगाड़ु यरदन गाड़ पार करिबेर महनैम नगर में पुजि ग्याय, और वांक मैसोंल उनुकैँ खाँण खवा और सफरक लिजी समान लै दे। यैक बाद दाउदल अबशालोम केँ हरूणक लिजी आपण सेना भेजी। वील उनुकैँ तीन दलों में बाँट दे, एक योआब केँ, दुसर अबीशै केँ, तिसर इत्तै केँ। वील उनुधैँ कौ, "मी लै तुमर दगाड़ उंनू।" पर मैसोंल कौ, "तुम बिल्कुल नि आला। किलैकि उं तुमुकेँ पकड़िबेर मारण चांनी, उकेँ हमेरि उदुक जादे जरवत न्हैँ। पर तुम तो हमार दस हजार मैसोंक बारबर छा। यैक लिजी भल यौ छु, कि तुम नगर में हमेरि मधत करणक लिजी तैय्यार रया।" रॉजल उनुधैँ कौ, "जस तुमुकेँ ठिक लागो, मी उस्सै करुंल।"

यैक लिजी रॉज फाटकक तरफ ठाँड़ है गोय और बकाइ सब सौ-सौ, हजार-हजारक दल बणैबेर निकलि ग्याय। जाण है पैली रॉजल योआब, अबीशै और इत्तै केँ हुकुम दिबेर कौ, "म्यर खातिर तुम अबशालोम में हात नि उठाया।" यौ बात सब मैसोंल लै सुणी।

यैक बाद रॉजक सेना अबशालोमक सेनाक खिलाफ में लड़ै करणक लिजी एफ्राइमक जंडव में आई, और यां इनर बीच में लड़ै है। लड़ै पुर जंडव में फैल गेछी, यौ कारणल तलवारक अलावा भौत सिपै जंडवक कारणल लै

मरि पड़ी। और दाउद रॉजॉक सिपैनोंल अबशालोमक सिपैनों कैं हरैबेर खिदाड़ दे। और उ दिन बीस हजार सिपै मरि ग्याय। अबशालोम लै आपण जान बचूणक लिजी खेच्चर मिं भैबेर भाजणौछी, और उ खेच्चर एक ठुलौ बांजक बोटक हाडक ताव बे गो, जैल अबशालोमक ख्वर उ हाड मिं अटक गोय। और उ बोट और धरतिक बीच मिं लटकी रै गोय।



हाडक बीच मिं अबशालोम

एक सिपैल उकैं लटकी देखिबेर योआबक पास जैबेर उकैं बता, "मील अबशालोम कैं एक बांजक बोट मिं लटकी देखि रॉखौ!" यौ सुणिबेर योआबल उधैं कौ, "जब त्वील उकैं देखौ, तो उकैं किलै नि मार? तब मी तुकैं चांदिक दस सिक्क और एक कमरबन्द लै दी छी।" लेकिन यौ सिपैल योआब धैं कौ, "अगर म्यर हात मिं एक हजार सिक्क लै दी जांछी, तब लै मी रॉजक च्यलक खिलाफ हात नि उठूछी, किलैकि रॉजल हमरै सामण तुम सबों कैं यौ हुकुम दी रॉखछी, कि तुम अबशालोम मिं हात नि उठाया। अगर मी उकैं मारि दिंछी, तब रॉजक हात म्यर खिलाफ उठछी और तब तुम लै मिंकैं नि बचाला।"

यौ बात सुणिबेर योआबल कौ, "मी यां त्यर सामण खाली ठाँड़ नि रै सकन।" और वील जैबेर तीन भॉल लिजैबेर बोट मिं अटकी अबशालोम मिं घोपि दे, और दस सिपैनोंल उकैं घेरिबेर मारि दे।

यैक बाद योआबल भुकौर बजा, और भुकौरक अवाज सुणिबेर सब मैस अबशालोमक सिपैनोंक पिछ करण छोड़िबेर वापिस आपण पड़ाव मिं आई।

फिर योआबल अबशालोमक लाश कैं ली जैबेर जंडव मिं एक गैल गड्ड मिं खितिबेर उकैं ढुडल भर दे। और अबशालोमक सब मैस आपण-आपण घरों मिं भाजि ग्याय।

दाउद अबशालोमक लिजी शोक करणौ

(२ शमूल १८:२०, ३१-३३, १६:५-६)

यैक बाद योआबल कुश देशक एक मैस धैं कौ, "जा, जे त्वील देखौ, उ रॉज कै बता।" यैक लिजी उ मैस योआब कै पैलाग करिबेर दौड़ गोय। वील दाउदक पास पुजिबेर उधैं कौ, "म्यर मालिक रॉज भली खबर सुणो! प्रभु परमेश्वरल तुमुकै उ मैसक हात बे छुड़ै है, जो तुमार खिलाफ उठी।"

रॉजल उधैं पुछौ, "के उ जवान अबशालोम ठिक-ठाक छा?" कुशील जबाब दे, "म्यर मालिक रॉजक सब दुश्मनोंक और जो बुराइ करनी, उ सबोंक दॉश उ जवानक जस हो।"

यौ सुणिबेर रॉज भौतै दुःखी हौ, और आपण कम्म मिं जैबेर डाड़ मारण लागौ, "हाय, म्यर च्यल अबशालोम, म्यर च्यल अबशालोम! हाय त्यर बदाव मी मरि जांछी!"

यौ सुणिबेर सिपैनों कै जतुक खुशी यौ जीतल है रैछी, उ सब मिं पाणि पड़ि गोय। तब योआबल रॉजक पास ऐबेर कौ, "महारॉज, आज तुमुल आपण सिपैनोंक मूख शर्मल काव करि है, जबकि उनुल तुम, तुमार नॉनतिनोंक, स्यैणियोंक और तुमार रखैलोंक प्राण बचाई। तुम उनर दगाड़ प्रेम करछा जो तुमर दगाड़ नफरत करनी, और उनर दगाड़ नफरत करछा जो तुमर दगाड़ प्रेम करनी। आज मिं पत्त लागौ कि हम सब मरि जांछी और अबशालोम ज्यून हुंछी तब तुम खुशि हुंनो! आँब तुम ठाँड़ उठो, भ्यार हिटो! और आपण सिपैनों धैं प्रेमल बात करो। परमेश्वरक कसम! अगर तुम भ्यार नि आला, तब एक लै सिपै आज रात बे तुमर दगाड़ नि रवो।"

तब रॉज ठाँड़ उठौ और नगरक द्वार लै आपण गद्दी लगैबेर भैटौ। और वील सिपैनों धैं भली कै समझैबेर बात-चीत करी।

यैक बाद यरुशलेम जैबेर दाउदक राज-पाँठ फिर पनपौ।

दाउद परमेश्वरक भवनक तैय्यारी करुं

(१ इतिहास २२:२-५, १७-१६)

यैक बाद दाउद रॉजल उ सब परदेशियों कै जो इसायल मिं छी, जाँम करिबेर उनुकै हुकुम दे कि उं परमेश्वरक भवन बणूणक लिजी हुड तैय्यार करो। और दाउदल यैक फाटकोंक द्वारोंक कीलों और कब्जोंक लिजी भौत

जादे लु और कॉस तैय्यार करौ, जैक क्वे गिनती नि छी। और सिदोन और सोरक मैस भौतै मात्रा मिं द्यारक बाँस दाउदक पास ल्याई।

दाउद यौ सब काम यैक लिजी करूणौछी किलैकि उ सोचणौछी, "म्यर च्यल सुलेमान एल नॉन छु, और एल तलक उकै यैक बारि मिं अंताज न्है। और जो भवन प्रभु परमेश्वरक लिजी बणाई जॉल, उ भौत ठुल और दुनी मिं परसिद्ध और देखीण मिं भलौ हुण चै।"

आखिरकार दाउदल मरण है पैली यैक लिजी सब तैय्यारी करी।

फिर दाउदल इस्रायलॉक सब अधिकारियों कैं लै आपण च्यल सुलेमानक मधत करणक हुकुम दिबेर कौ, "तुमर प्रभु परमेश्वर तुमर दगाड़ छन, और उनुल तुमुकै चारों तरफ बे अराम दे। किलैकि उनुल दुसर जातिक मैसों कैं तुमुकै सौपौ और उं सब प्रभु परमेश्वरक और तुमर बश मिं छन। आँब तुम आपण मन और प्राणल प्रभु परमेश्वरक सेवा करो। आँब उठो, और प्रभु परमेश्वरक पवित्र भवन बणाओ, ताकी तुम आपण प्रभु परमेश्वरक वैदक संदूक और परमेश्वरक पवित्र समानों कैं उ भवन मिं ली जाओ, जो प्रभु परमेश्वरक नामल बणणिवॉल छु।" प्राण

परमेश्वरक भवनक बारि मिं दाउदक हुकुम

(१ इतिहास २३:१, २८:१-२१)

जब दाउद रॉज बुढ़ है गोय, तब वील आपण च्यल सुलेमान कैं रॉज बणा। दाउदल यरुशलेम नगर मिं सब ठुल-ठुल सैपों कैं जॉम करौ। फिर दाउद रॉजल ठाँड़ हबेर कौ, "भाइयो, मेरि दिलकि मंशा छी कि मी आपण परमेश्वरक लिजी एक भवन बणूं, जां उं वैदक संदूक लै धरी जै सको। और मील उ भवन बणूणक लिजी तैय्यारी लै करि है। पर परमेश्वरल मिधैं यस कौ, कि तु म्यर नामक आदर-सम्मानक लिजी भवन नि बणालै, किलैकि तु लडै करणी एक सिपै छियै, और त्वील मैसों कैं मारि रॉखौ।

फिर लै इस्रायल देशक प्रभु परमेश्वरल म्यर सॉर परिवार मिंबे मिक्कैं छांटौ, और मिक्कैं यांक रॉज बणा। उनुल मिक्कैं भौत च्याल देई, पर उनुल म्यार सब च्यालों मिंबे सुलेमान कैं छांटौ कि उ म्यर बाद रॉज बणो। प्रभुल मिधैं कौ, कि त्यर च्यल सुलेमान म्यर भवन और वीक पटाङ्गण बणाल, किलैकि मील उकै यौ काम करणक लिजी आपण तरफ बे ठैरै रॉखौ। उ म्यर च्यल और मी वीक बौज्यू बणुंल। अगर उ म्यर न्यायक बाँट मिं भरौस करिबेर मजबूतील हिटल, जसिक उ आज करणौ, तब मी वीक राज कैं हमेशा समाउंल।

यैक लिजी, सॉर इस्रायल देशॉक मैसोंक और प्रभुक सामण, मी तुमुकैँ यौ हुकुम दिणयूं, कि तुम प्रभु परमेश्वरक सब हुकुमों कैँ मानो और उनर पालन करो। तब तुम यौ भल देश मिं कब्ज करि सकला और आपण नॉनतिनों कैँ यौ देशक जांग आपण विरासत मिं दी सकला।

ओ म्यर च्यल सुलेमान, तु आपण बौज्यूक परमेश्वर कैँ मानि ले। और आपण पुर मन-चितल खुशि हबेर उनेर सेवा कर। प्रभु मैस कैँ परखनी, उ मैसक हरेक मशौद और विचार कैँ जाणनी। अगर तु उनुकैँ हुनलै, तब उतुकैँ मिलॉल, लेकिन अगर तु उनुकैँ छोड़ि द्यलै, तब उं लै तुकैँ हमेशाक लिजी छोड़ि द्याल। आब ध्यानल सुण, प्रभुल तुकैँ आपण पवित्र भवन बणूणक लिजी छांटी रॉखौ। आब तु सॉर हबेर यकैँ बणूणक काम शुरु करि दे।"

दाउदल आपण च्यल सुलेमान कैँ परमेश्वरक भवनक खणों, भकॉर धरनी खणों, मेलिक खणों, भितेरॉक खणों और यौ भवनक सबों है जादे पवित्र जांगक नमुन दे। इनर अलावा वील भवनक पटाडण, चारो तरफॉक खनों, और प्रभुक भेटक खनोंक नमुन लै दे। वील सुलेमान कैँ याजकों और उनर मधत करणी लेवी दलॉक मैसोंक काम लै बता, और भवनक समानक बारि मिं लै, जो यौ काम मिं इस्तमाल हुंछी। वील हरेक अराधना मिं इस्तमाल हुणिवॉल सुनॉक भाडोंक लिजी सुनकि मात्रा लै बतै। और इसिकै हरेक अराधना मिं इस्तमाल हुणिवॉल सब भाडों मिं चांदिक मात्रा लै बतै।

और वील यौ लै बता कि सुन और चांदिक द्यु धरनिवॉल खंभों और उ द्युनों मिं कतुक सुन और चांदि लागल। दाउदल यौ सबों मिं लागणी सुन और चांदिक मात्र लै तय करी। और भेटक र्वटक सुनकि मेजोंक सुन और चांदिक मेजोंक चांदि लै तय करी गे। यैक अलावा भांड-कुणोंक सुन-चांदि, च्वख सुनक धूप-दानक वेदीक सुन और वैदक संदूकक मेलि बे लागी स्वर्गदूतोंक रथ कैँ बणूणक लिजी लागणी सुनक मात्रा लै तय करी। यौ सब वील परमेश्वरक हुकुमक अनुसार सुलेमानक लिजी लिखौ।

तब दाउदल आपण च्यल सुलेमान धैँ फिर कौ, "ताकत और हिम्मत करिबेर परमेश्वरक यौ भवन कैँ बणूणक काम शुरु कर। डर इन और निराश नि हो। म्यर प्रभु परमेश्वर त्यर दगाड़ छु। जब तलक प्रभुक अराधना करणक लिजी परमेश्वरक यौ भवन बणिबेर तैय्यार नि है जाँन, तब तलक उं न तुकैँ छोड़ॉल और न त्यागॉल।

देख, याजक और लेवी वंशांक मैस परमेश्वरक भवन मिं काम करणक लिजी तैय्यार छन। और इनर अलावा यौ भवन बणूणक काम मिं सिपॉल

हरेक मैस खुशि हबेर तेरि मधत करॉल। और सारि जनता और राज-काजवाँल मैस लै त्यर हुकुम कै मानॉल।"

सुलेमानक स्वीण

(१ राजा २:१२, ३:५-१५)

दाउदक मरणक बाद वीक च्यल सुलेमान रॉज बणौ। एक रात परमेश्वरल स्वीण मिं उधैं कौ, "ओ सुलेमान, तुकै के चैं? मी तुकै के दियूं?"

यौ सुणिबेर सुलेमानल कौ, "ओ म्यर परमेश्वर, मी भौत जवान छूं और राज करणक बारि मिं के नि जाणन। फिर लै तुमुल मिक्कै रॉज बणा! यैक लिजी तुम मिक्कै बुद्धि दिया कि मी न्यायल राज करि सकूं, और भल-नकक फरक करि सकूं। नतेरि, मी तुमेरि इदुक ठुलि जनताक न्याय कसिक करूंल।"

यौ सुणिबेर प्रभु परमेश्वर भौत खुशि हई, कि सुलेमानल यौ मांगौ। उनुल सुलेमान धैं कौ, "किलैकि त्वील नै लम्बि उमर, नै धन-दौलत और नै आपण दुश्मणोंक मौत लेकिन बुद्धि और समझ मांगी, यैक लिजी देख, मी त्यर कूणक अनुसार तुकै दिंनू। मी तुकै बुद्धि और समझल भरी मन दिंनू, जैल त्यर चारि न तो क्वे पैली छी, न क्वे त्यर बाद ह्वल। और इदुकै नै, लेकिन जो त्वील नि मांग, मी तुकै उ लै दिणयूं। तु इदुक ठुल और सेठ ह्वलै कि जब तलक तु ज्यून रौलै क्वे लै रॉज त्यर चारि नि हो। और अगर तु लै आपण बौज्यूक चारि म्यर हुकुमों कैं माननै रौलै, तब मी त्यर उमर कैं लै बढूंल।"

तब सुलेमान उठिबेर समझि गोय कि परमेश्वरल स्वीण मिं मिधैं बात करी। और वील परमेश्वरक तम्बू मिं जैबेर उनर लिजी भेट चढ़ै।

सुलेमानक न्याय

(१ राजा ३:१६-२८)

यैक थ्वाड़ बखतक बाद सुलेमान रॉजक सामण द्वी स्यैणी न्यायक लिजी आई जो वेश्या छी। उनुमिंबे एकल रॉज धैं कौ, "ओ म्यर मालिक, हम द्विये झणी यक्के घर मिं रूंनू। और थ्वाड़ बखत पैली मील एक च्यल कैं जन्म दे। यैक तीन दिन बाद यैल लै एक च्यल कैं जनम दे। हम द्विये एक घर मिं रूंछी और हमर अलावा वां क्वे नि छी। तब एक दिन रात मिं यैक च्यल मरि पड़ौ, किलैकि यैक भीदिक उ च्यापी पड़ौ। जब यैल उकै अधरात मिं मरी देखौ, तब यैल आपण च्यल कैं म्यर दगाड़ पड़ै दे और म्यर ज्यून च्यल कैं आपण

दगाड़ ली जानै रै। उ बखत मिक्कै नीन ऐ रैछी। जब मी रात्ति आपण च्यल कैं दूध दिणक लिजी उठयूं, तब मील उकैं मरी देखौ! लेकिन जब मील उकैं ध्यानल देखौ, तब मील पछ्याणौ कि उ म्यर च्यल न्है।"

यैक बाद दुसेरि स्यैणिल उधैं कौ, "यौ झुट बात छु, यौ ज्यून च्यल म्यर छु, मरी च्यल त्यर छी।" फिर पैली वालिल कौ, "नै, तौ म्यर च्यल छु, त्यर च्यल मरि गो।" इसिक उं रॉजक सामण बहस करणाछी।

यौ सब देखिबेर रॉजल आपण नौकर कैं हुकुम दिबेर कौ, "एक तलवार म्यर पास ल्याओ।" नौकर वीक सामण तलवार लिबेर आ। फिर रॉजल कौ, "च्यल कैं लिबेर आओ, और तलवारल वीक द्वी टुकूण करिबेर आँद-आँद यौ द्विनो कैं दी दियो।" तब च्यलकि असली इज जोर-जोरल कूण लागी, "रॉजज्यू, मी तुमर खुटॉन पड़नू, तब लै तकैं नी मारो और यौ स्यैणी कैं दी दियो!" लेकिन दुसेरि स्यैणिल कौ, "यौ च्यल न मिक्कै दियो और न तकैं, तैक द्वी टुकूण करि दियो।"

यौ सब देख-सुणिबेर रॉजल आपण नौकर धैं कौ, "यकैं नि मारो, लेकिन पैलिवालि स्यैणी कैं दी दियो, किलैकि वी यैक असली इज छु।"

तब रॉजक यौ न्यायक खबर पुर इस्रायल देश मिं फैल गई। और सब मैस सुलेमानक और लै जादे आदर करण लागीं, किलैकि उं समझि ग्याय कि परमेश्वरल उकैं बुद्धि और समझ दी है।

सुलेमान परमेश्वरक भवन बणू

(१ राजा ६:१-३८)

जब सुलेमान कैं इस्रायलियोंक रॉज बणी चार साल है ग्याछी, तब वील प्रभु परमेश्वरक लिजी उ भवन बणूणक काम शुरु करौ। रॉज सुलेमानल जो भवन परमेश्वरक लिजी बणा, वीक लम्बाई साठ हात, चौड़ाई बीस हात, और उचाई तीस हात छी। सुलेमानल भवनक ढुङक दिवालक भितेरक हिस्स और पाल मिं लै द्यारिक तक्त लगाई। फिर वील परमेश्वरक वैदक संदूक धरणक लिजी भवनक भितेर एक पवित्र जाँग बणै। वीक लम्बाई बीस हात, चौड़ाई बीस हात और उचाई बीस हात छी, यैक माथि मिं वील च्वख सुन लगवा, और वील वेदीक चारों तरफ लै सुन लगवा। फिर वील भवनक भितेर और भ्यारक खनोंक चारों तरफक दिवालों मिं फांकवॉल जीव, खजूरक बोट और फूल लगाई। और सुलेमानल भवनक पाल सुनक बणवैं।

सुलेमानक राज्यक इग्यरूं साल मिं यौ भवन पुर योजनाक अनुसार बणिबेर तैय्यार है गोय। इसिक सुलेमान रॉज कै यौ भवन कै बणूण मिं सात साल लागीं।

सुलेमानक पास शेबा देशकि रानी

(१ राजा १०:१-१३)



शेबाक रानी और सुलेमानक भेट

जब शेबा देशकि रानील सुलेमानकि बढ़ाई सुणी, तब उ आपण मुश्किल-मुश्किल सवालों कै लिबेर वीक परीक्षा करणक लिजी ऐ। उ आपण दगाड़ दरबारियों, सैप, दास-दासियों कै मश्याल, सुन और म्हैंग मणियोंल लादी ऊंटों कै लिबेर यरुशलेम ऐ। जब वील सुलेमान रॉज धै आपण सब सवाल पुछीं, तब सुलेमानल वीक सब सवालोक जबाब दे, और क्वे लै यस सवाल नि छी जैक जवाब उ नि दी सक। जब शेबाक रानील सुलेमानक बुद्धिमानी समझी, वीक दरबारियोंक ठाट-बाँट देखौ, उ महलक खाँण खा, वीक कर्मचारियोंक काम-धाम और उनर लुकुड़ देखीं, और वीक बणवाई भवन कै देखौ, और उ बलिदान जो उ चढ़ूछी, यौ सब देखिबेर उ हक

रै पड़ी। वील रॉज धै कौ, "तुमर काम और बुद्धिमानीक बारि मिं जो मील आपण देश मिं सुणौ, उ सब सांचि छु। मील सब बातोंक विश्वास तब तलक नि कर, जब तलक खुद आपण आँखोंल नि देखि लेई। मिंकै तो यौ सबोक आँद लै नि बताई गोछी। तुमेरि बुद्धिमानी और धन-दौलत उ हबेर भौत जादे छु, जो मील सुणौ। धन्य छन तुमार मैस और तुमार सेवक जो हमेशा तुमर दगाड़ रैबेर तुमेरि बुद्धिमानीक बात सुणनी। और महान छन तुमार प्रभु परमेश्वर जो तुमुकै देखिबेर इदुक खुशि हई कि उनुल इसायलियोंक

राजगद्दी मिं तुमुकै बैठा। किलैकि परमेश्वरल हमेशा इस्रायलियोंक दगाड़ प्रेम करौ, यैक लिजी उनुल न्याय और धर्मक काम करणक लिजी तुमुकै रॉज बणा।"

यैक बाद शेबाक रानील सुलेमान कै चार हजार किलो सुन, और किमती-किमती मणि भेट मिं देई। वील इदुक जादेक मातरा मिं मश्याल लै दे, कि यौ हबेर जादे फिर कभै इस्रायल देश मिं नि आय।

सुलेमानल लै शेबाक रानी कै भौत भेट दे। जे लै वील रॉज धै मांगौ, रॉजल उ सब उकै दे। यैक बाद उ आपण देश लौट गोई।

सुलेमानॉक खूब स्यैणी

(१ राजा ११:१-१२)

लेकिन जसिक दाउद आपण पुर मनल प्रभु परमेश्वर कै मानछी, सुलेमानल यस नि कर। उ भोतै चेलियोंक दगाड़ प्रेम करण लागौ, और वील मिस्री, मोआबी, अम्मोनी, एदोमी और हिती सब अलग अलग जातिक चेलियोंक दगाड़ ब्या करौ। लेकिन प्रभु परमेश्वरल इस्रायलियों कै यौ हुकुम दी रॉखछी, कि तुम दुसेरि जातियोंक दगाड़ ब्या-बरात झन करिया, किलैकि उं तुमुकै आपण द्याप्तोंक तरफ करि ल्याल। लेकिन सुलेमान उनर प्यार मिं डुब गोय। वीक सात सौ स्यैणी और तीन सौ रखैल छी।

तब बुढ़ापा मिं वीक स्यैणियोंल उकै परमेश्वरक तरफ बे आपण-आपण द्याप्तोंक तरफ मोड़ि दे, और सुलेमानल वी काम करीं जो प्रभु परमेश्वरक नजर मिं खराब छी। उ सिदोनी जातिक देवी अशेराह और अम्मोनी जातिक सड़ैन द्याप्त मिल्कोनक पुज करण लागौ, और वील आपण सब स्यैणियोंक लिजी मंदिर बणाई, जां उं आपण-आपण द्यप्तोंक पुज करछी।

सुलेमानल यौ सब पाप करौ, जब कि परमेश्वरल उधैं द्वी बार दर्शन दिबेर कौछी, कि तु म्यर अलावा कैकै पुज नि करिये। यैक लिजी परमेश्वर कै सुलेमान देखी भौत रीश ऐ। उनुल सुलेमान धै कौ, "किलैकि त्वील यस करौ, यैक लिजी मी त्यर राज कै क्वे दुसर मैस कै द्यूल। लेकिन जब तलक तु ज्यून रौलै, तब तलक तु राज करलै। लेकिन जब त्यर च्यल त्यर जाँग मिं रॉज बणल, तब मी यौ राज उधैं ल्यूल। लेकिन पुर नै, त्यर च्यल कै मी एक गोत्र द्यूल, किलैकि त्यर बौज्यू दाउद म्यर सेवक छी, और यरुशलेम म्यर चुनी नगर।"

आहाब इस्रायलक रॉज

(१ राजा १६:२६-३३)

जस परमेश्वरल सुलेमान धै कौछी, उनुल वीक दगाड़ उरसै करौ। सुलेमानक मरणक बाद वीक च्यल रेहाबीम कै राज बणा, पर जादेतर इस्रायलियों उकै कबूल नि कर। और उनुल एक दुसर मैस कै आपण रॉज बणा। और इसिक द्वी अलग-अलग देश और उनार रॉज बणी। उत्तरक तरफक टुलवॉल हिस्सक नाम इस्रायल और पश्चिमक तरफक नॉनवॉल हिस्सक नाम यहूदा छी। यौ द्विवै देशोंक मैसौल परमेश्वरक खिलाफ पाप करौ। उ बखत मिं क्वे-क्वे रॉजौल बीच-बीच मिं परमेश्वरक हुकुमक पालन करौ पर भौत रॉजौल नि कर। और उ देशोंक मैसौल दुसर दयाप्तोंक पुज करण शुरु करि दे। सुलेमान रॉजक भौत सालोंक बाद इस्रायल मिं एक रॉज बणौ जैक नाम आहाब छी, जो भौत खराब छी। और उकै खबरदार करणक लिजी परमेश्वरल आपण सेवक एलियाह कै वीक पास भेजौ।

सुलेमान रॉजक भौत सालोंक बाद आहाब इस्रायलियोंक रॉज बणौ और वील बाइस साल तलक इस्रायलियों मिं राज करौ। आहाबल परमेश्वरक नजर मिं उं सब रॉजों हबेर जादे खराब काम करीं, जो उ हबेर पैली छी। वील सिदोनियाक रॉजकि चेलि ईजेबेलक दगाड़ ब्या करि ले, और वील बाल द्यप्तक मंदिर बणैबेर वीक पुज करण लागौ, और वीक अलावा अशेराह देबिक लै। इसिक वील प्रभु परमेश्वर कै भौत रीश दिलै।

परमेश्वरक सेवक एलियाह

(१ राजा १७:१-२४)

यैक लिजी एलियाह नामक मैसल आहाबक पास जैबेर कौ, "मी इस्रायलक प्रभु परमेश्वरक सेवक छूँ, और मी उं ज्यून परमेश्वरक जीवनक कसम खैबेर कूनू, कि जब तलक मी नि कूल, तब तलक न ओस पड़ेलि और न द्वियो ह्वल!" यौ कूणक बाद एलियाह वांबे न्है गोय। तब परमेश्वरक बचन एलियाक पास पुजौ, "तु यां बे न्है जा, और करीत ग्धयर मिं जैबेर लुक जाये। तु यौ ग्धयरक पाणि पिये, और खॉणक चिन्ता नि करिये, किलैकि मील काँवों कै हुकुम दी रॉखौ कि उं त्यर लिजी वां खॉण पुज्याल।"

यैक लिजी वील यस्सै करौ, जस परमेश्वरल हुकुम दी रॉखछी। काव एलियाहक लिजी रात्ति-ब्याव र्वट और शिकार ल्युंछी, और उ वांक पाणि पिंछी।

फिर यस हौ, कि द्यो नि हुणक कारणल ग्धयरक पाणि सुख गोय। तब परमेश्वरल एलियाह धै कौ, "उठ, सिदोनी नगर सारफत मिं जा और तब

तलक वैं रये, जब तलक मी नि कून। देख, मील वां एक अन्य जातिक विधाव स्यैणि कैं त्यर लिजी खॉणक इंतजाम करणक हुकुम दी रॉखौ।"

यैक लिजी एलियाह उठिबेर सारफत नगर मिं गो। जब उ नगरक फाटक मिं पुजौ, तब वील एक विध्वा कैं लाकाँड़ जॉम करण देखौ। एलियाल उकैं बुलैबेर कौ, "ओ दिदी, म्यर लिजी एक गिलास पाणि ल्यै दियो।" जब उ पाणि ल्युणक लिजी जाणैछी, तब वील उधैं यौ लै कौ, "एक र्वटक टुकुड़ लै ल्यै दिया!" लेकिन वील कौ, "तुमर प्रभु परमेश्वरक जीवनक कसम, म्यर घर मिं एक लै पॉकी र्वटक टुकुड़ न्हैं, सिरफ एक मुठि पिसूं और मिणी-मिण तेल छु। देखो, मी लाकाँड़ यैक लिजी जॉम करणौछी कि मी और म्यर च्यल वीक एक र्वट पकैबेर खूंल, यैक बाद तो फिर भुकल मरनै छु।" यौ सुणिबेर एलियाल उधैं कौ, "तु डर झन, जस्सै त्वील कौ, उस्सै कर। पर पैली वीक एक नॉन-नॉन र्वट पकैबेर म्यर पास ल्या। वीक बाद फिर तु आपण और आपण च्यलक लिजी पकाये। किलैकि इस्रायलियोंक प्रभु परमेश्वर यस कूंनी, कि जब तलक मी धरति मिं द्यो नि बरसूंल, तब तलक तुमर यौ पिसूं और तेल खतम नि हवल।

यौ सुणिबेर उ गे और वील उस्सै करौ। और उ पिसूं और तेल खतम नि होय, जस परमेश्वरल एलियाक जरियल कैं रॉखछी, उस्सै हौ। इसिक विध्वाल, वीक च्यलल और एलियाल भौत बखत तलक खॉण खानै रई।

यैक बाद एक दिन विध्वाक च्यल बिमार हबेर मारि गोय। तब विध्वाल एलियाह धैं कौ, "ओ परमेश्वरक मैस, मील तुमर के बिगाड़ रॉखछी? के तुम म्यर घर मिं यैकै लिजी ऐ राछिया, कि परमेश्वर म्यार पापों कैं याद करिबेर वीक सजा दिणक लिजी म्यर च्यल कैं मारि दियो?"

तब एलियाल उधैं कौ, "आपण च्यल कैं म्यर पास ला।" फिर वील च्यल कैं एलिया कैं दे और एलिया उकैं आपण कम्म मिं ली गो। तब एलियाल प्रभु परमेश्वर धैं बिनती करी, "ओ प्रभु परमेश्वर, तुमुल यौ विध्वाक च्यल कैं किलै मारौ, जब कि वील मी मिं इदुक किरपा करिबेर आपण दगाड़ धरौ?"

तब उ च्यलक माथि मिं तीन बार पड़ौ और वील प्रभु परमेश्वर कैं धात लगैबेर कौ, "ओ प्रभु परमेश्वर, मी तुमुधैं विनती करनू कि यौ च्यलक प्राण यकैं लौटै दियो!" तब प्रभु परमेश्वरल एलियाक विनती सुणिबेर च्यलक प्राण च्यल मिं वापिस खिति देई, और तब उ ज्यून है गोय। फिर एलियाह च्यल कैं वीक इजक पास लिबेर गो और वील उधैं कौ, "देख, त्यर च्यल ज्यून छु।"

तब स्यैणिल एलियाह धैं कौ, "ऑब मी जाण गोयूं कि तुम परमेश्वरक मैस छा, और तुम सांचि मिं परमेश्वरक बचन बतूछा!"

परमेश्वर आपण सामर्थ दिखूंनि

(१ राजा १८:१-४६)

जब द्यो नि हुणक कारणल अकाव पड़ी तिसर साल लागि गोछी, तब प्रभु परमेश्वरल एलियाह धैं कौ, "ऑब तु यांबे रॉज आहाबक पास जा, किलैकि मी धरति मिं द्यो बरसूल।" यैक लिजी एलियाह आहाबक पास गो।

जब आहाबल एलियाह कैं देखौ, वील उधैं कौ, "ऐ हमुकैं सतूणी, तु यां किलै ऐ रौछै?" एलियाल जबाब दे, "मील तो इस्रायलियों कैं नि सतयाई, लेकिन त्वील और त्यार बौज्यूक खानदानल सतया, किलैकि तुम प्रभु परमेश्वरक हुकुमों कैं छोड़िबेर बाल द्यपतक पुज करछा! ऑब तु सब इस्रायली मैसों कैं कर्मल डॉन मिं जॉम करवा। और बाल द्यपतक चार सौ पचास पुजारी जो छन, और अशेराह देवीक पुजारियों कैं लै लिबेर वां आ, जनर सब खर्च-पात तेरि स्यैणि दीं।"

यौ सुणिबेर आहाबल पुर इस्रायलियों कैं और सब पुजारियों कैं लै कर्मल डॉन मिं बुलैबेर जॉम करौ।

तब एलियाल सब मैसोंक सामण ऐबेर उनुधैं कौ, "तुम कब तलक द्वी विचारों मिं फस रौला? अगर प्रभु परमेश्वर छन, तब उनर पछिन जाओ, और अगर बाल द्यपत परमेश्वर छु, तब वीक पछिन जाओ। तुम यौ फैसाल करो कि तुम कैक सेवा करला!" लेकिन मैसोंल वीक यौ बातक के जबाब नि देय।

तब एलियाल मैसों धैं कौ, "प्रभु परमेश्वरक सेवकों मिंबे केवल एक मी बचि रयूं, और बालक पुजारी चार सौ पचास छन। ऑब तुम म्यर और यौ पुजारियोंक लिजी द्वी बल्द लिबेर आओ, और यौ पुजारी उनुमिं बे आपण लिजी आफी छांटाल। फिर उ बल्दोंक टुकुड़-टुकुड़ करिबेर उकैं लाकड़ोंक माथि मिं धरॉल, लेकिन उमिं ऑंग नि लगाल। तब मी लै यस्सै करुल, और ऑंग नि लगूल। यैक बाद तुम आपण द्यापत कैं पुकारिया और मी आपण परमेश्वर कैं। जो ऑंगक जरियल जबाब द्याल, वीं परमेश्वर ठैराल।" तब सब मैसोंल कौ, "यौ ठिक छु।"

यैक लिजी एलियाल बालक पुजारियों धैं कौ, "पैली तुम आपण लिजी एक बल्द छांटि लियो, किलैकि तुम सब मैस भौत छा। तुम बलदक टुकुड़-टुकुड़ करिबेर उकैं वेदी मिं धरिया और आपण द्यप्त कैं धात लगाया, लेकिन वीक ताव बे आंग नि जगाया।"

तब उनुल उ बल्द कैं जो उनुल छांटौ काट-कूटिबेर वेदी मिं धरौ। फिर उनुल बाल द्यप्त कैं रात्ति बे लिबेर दोफर तलक पुकारनै रई, "हे बाल, हमेरि पुकार सुणो!" लेकिन नै क्वे अवाज है, नै क्वे आंग जलौ। और उं उ वेदीक चारों तरफ नाचनै-कुदनै रई।

जब दोफर तलक के नि होय, तब एलियाल उनर हसि उडैबेर कौ, "आइ जोरल पुकारो! है सकुं उ सोच-विचार मिं ह्वाल, या कैं झाड़-पिशाब करण जैरा ह्वाल, या है सकुं कि उनुकैं नीन ऐरै ह्वेलि और उकैं बिज्जणकि जरवत छु!"

यैक लिजी फिर उनुल जोर-जोरल पुकारनै और आपण रीती-रीवाजल तलवार और भौलल आपुकैं यां तलक घैल करौ, कि उं खूनल लत-पत्त है ग्याय। ब्याव बखत तलक उं यस्सै करनै रई, लेकिन उनुकैं क्वे जबाब नि मिल, और वेदी मिं आंग लै नि लाग।

तब एलियाल सब मैसों धैं कौ, "म्यर पास आओ।" यैक लिजी सब मैस वीक सामण आई, और वील इस्रायलक गोत्रोंक गिनतील बार ढुड लिबेर परमेश्वरक वेदी कैं, जो पैली टोड़ि रॉखछी, उकैं दुबार बणा। फिर वील वीक चारों तरफ गड्ड खोदौ। और वेदी मिं लाकाँड़ लगैबेर वीक माथि मिं बलदक टुकुड़ बणैबेर धरीं। फिर वील उनुधैं कौ, "तुम चार घड़ पाणि भरिबेर वेदी मिं खिति दिया।" जब उनुल पाणि खिति हैछी, एलियाल उनुधैं फिर कौ, "दुबार खितो।" इसिक वील उनुधैं तीन बार पाणि खितवा। तब वेदीक चारों तरफ पाणि-पाणि है गोय, और वील गड्ड कैं लै पाणिल भर दे।



परमेश्वर एलियाकि प्रार्थनाक जवाब दिणई

यैक बाद एलियाल वेदीक नजिक जैबेर कौ, "ओ इब्राहीम, इसहाक और इस्रायलक प्रभु परमेश्वर, आज यौ बात साबित हुण दियो कि इस्रायल मिं तुमी परमेश्वर छा, और मी तुमर दास छूं, और मील यौ सब तुमर कूणल करौ। ओ प्रभु परमेश्वर, मेरि बात सुणो, मेरि बात सुणो, कि यौ सब जाण जाओ कि केवल तुमी परमेश्वर छा, जैल इनर मन फिरो।"

तब प्रभु परमेश्वरक तरफ बे उ वेदी मिं आंग लागौ और वील ढुडोक दगाड़ धूल-मॉट जलैबेर भसम करिबेर उ गड्डक पाणि लै सुखै दे।

जब मैसौल यौ द्यखौ, तब सबौल मुखक बल चोढ़ हबेर कौ, "प्रभु परमेश्वर छन, प्रभु परमेश्वर छन!" तब एलियाल उनुधै कौ, "बाल द्यप्टोक पुजारियों कै पकड़ि लियो, उनुमिंबे एक कै लै नि छोड़या।" और उनुल उनुकै पकड़ि ले और एलियाल उनुकै किशोनक ग्धयर मिं लिजैबेर मारि दे।

यैक बाद एलियाल आहाब रॉज धै कौ, "आब तुम घर जाओ, किलैकि मिंकै भौत भयंकर द्यो लागणक घड़घड़ाटक अवाज सुणीणै।" तब पुर अगाश मिं घनघोर काव बादोवोक दगाड़ भयंकर तूफानल चारों तरफ अन्यार पट्ट हबेर भौतै द्यो लागण भै गोय और आहाब रॉज आपण रथ मिं भैबेर न्है गोय।

जबकि आहाबल परमेश्वरक सामर्थ इसिक देखी तब लै उ पाप करनै रौ। यैक थ्वाड़ बखत बाद उ एक लड़ै मिं मारी गोय।